

UPSI bantu keluarga Farah Kartini

Oleh **Rosman Shamsudin** - Julai 17, 2024 @ 9:43pm
bhnews@bh.com.my



Md Amin (depan empat kanan) menyampaikan sumbangan kepada ibu Allahyarham Nur Farah Kartini di UPSI, Tanjung Malim, hari ini. - Foto ihsan UPSI

TANJUNG MALIM: Universiti Pendidikan Sultan Idris (UPSI) akan membantu sepenuhnya semua urusan keluarga alumninya, Nur Farah Kartini Abdullah, 25, sepanjang berada di sini.

Naib Canselor, Prof Datuk Dr Md Amin Taff berkata, pihak pengurusan tertinggi bersimpati dengan keluarga mangsa dan berharap mereka tabah.

"Kami akan memudahkan urusan keluarga sepanjang di sini termasuk menyediakan penginapan, bantuan proses pengebumian, khidmat sokongan kaunseling dan psikologi, derma serta sokongan sumbangan kewangan.

"Seluruh warga UPSI, malah rakyat Malaysia sangat bersedih dan berduka cita dengan kejadian menimpa Nur Farah Kartini yang juga penuntut pelajar cemerlang dan aktif membantu UPSI dalam pelbagai program," katanya.

Beliau berkata demikian selepas menyampaikan sumbangan dan meluangkan masa bertemu ibu serta keluarga mangsa di sini, hari ini.

Sementara itu, Yang Dipertua MPP UPSI, Amirul Haiqal Amirrudin Baki berkata, arwah seorang yang sangat baik, mesra dan jasanya akan dikenang oleh semua mahasiswa.

"Sebagai tanda prihatin, MPP juga mengambil inisiatif mengumpul sumbangan untuk disampaikan kepada keluarganya, "katanya.

Turut diadakan bacaan Yasin dan tahlil di Masjid Ar-Rasyidin, Kampus Sultan Azlan Shah.